

氏族典第八十三卷

胡姓部彙考

蔡中郎集 胡公碑銘

公諱廣字伯始南郡華容人也其先自嬀姓建國南土曰胡子春秋書焉列於諸侯公其後也

陳留太守胡公碑

君諱碩字季叡交趾都尉之孫太傅安鄉侯少子也其先與楚同姓別封於胡以國爲氏

韓昌黎集 唐故少府監胡公墓神道碑

胡姓本出安定後徙清河於今爲宗城屬貝州

注胡公滿封於陳爲周陶正以諡爲姓

鄭樵通志

以國爲氏

周同姓國

胡氏子爵其地在今潁州汝陰西二里胡城是也定十五年楚滅之其後以國爲氏或云胡公滿封於陳其後亦爲胡氏又樂陵之胡賜姓李又河南之胡改紇骨氏爲胡也

同名異實

胡氏有二周之胡國爲胡氏後魏紇骨氏亦爲胡氏

廖用賢尙友錄 胡姓

胡安定羽音又望出新蔡洛陽

胡姓部列傳一

上古 胡曹

按呂氏春秋胡曹作衣

周 胡齕

按孟子註胡齕王左右近臣

胡衍

按國策秦攻衛之蒲胡衍謂樗里疾曰公之伐蒲以爲秦乎以爲魏乎爲魏則善爲秦則不賴矣衛所以爲衛者以有蒲也今蒲入於魏衛必折於魏魏亾西河之外而弗能取者弱也今并衛於魏魏必強魏強之日西河之外必危且秦王亦將觀公之事害秦以善魏秦王必怨公樗里疾曰奈何胡

衍曰公釋蒲勿攻臣請爲公入戒蒲守以德衛君糈里疾曰善胡衍因入蒲謂其守曰糈里子知蒲之病也其言曰吾必取蒲今臣能使釋蒲勿攻蒲守再拜因効金三百鎰焉曰秦兵誠去請厚子於衛君胡衍取金於蒲以自重於衛糈里子亦得三百金而歸又以德衛君也

胡陽

按姓氏急就篇秦客卿胡陽

漢 胡武

按漢書陳勝傳勝以胡武爲司過

胡安

按尙友錄安臨邛人聚徒教授於白鹿山司馬相如嘗從之受經

胡建

按漢書胡建傳建字子孟河東人也孝武天漢中守軍正丞時監軍御史爲姦穿北軍壘垣以爲賈區建誅之由是顯名後爲渭城令治甚有聲值昭帝幼皇后父上官將軍安與帝姊蓋主私夫丁外

人相善外人怨故京兆尹樊福使客射殺之客臧公主廬建將吏卒圍捕蓋主怒使人上書告建侵辱長公主大將軍霍公寢其奏後光病上官氏代聽事下吏捕建建自殺

胡常

按漢書翟方進傳是時宿儒有清河胡常與方進同經常爲先進名譽出方進下論議不右方進方進知之候伺常大都授時遣門下諸生至常所問大義疑難常知方進之宗讓己遂相親友

胡剛

按後漢書胡廣傳廣六世祖剛清高有志節平帝時大司農馬宮辟之值王莽居攝剛解其衣冠懸府門而去遂以命交趾隱於屠肆之間後莽敗乃歸鄉里

胡烈

按尙友錄烈襄陽守築隄灌田民歌曰譬春之陽如冬之日

後漢 胡貢

按後漢書胡廣傳廣父貢交趾都尉

按襄陽耆舊記云廣父名寵與此異

胡廣

按後漢書胡廣傳廣字伯始南郡華容人也少孤貧入郡爲散吏舉孝廉既到京師試以章奏安帝以廣爲天下第一旬月拜尙書郎五遷尙書僕射時左雄議改察舉之制限年四十以上廣上書駁之出爲濟陰太守以舉吏不實免復爲汝南太守入拜大司農漢安元年遷司徒質帝崩代李固爲太尉錄尙書事以定策立桓帝封育陽安樂鄉侯靈帝立與太傅陳蕃參錄尙書事會蕃被誅代爲太傅性溫柔謹素常遜言恭色達練事體明解朝章雖無蹇直之風屢有補闕之益故京師諺曰萬事不理問伯始天下中庸有胡公及共李固定策大議不全又與中常侍丁璜婚姻以此議毀於時熹平元年薨諡文恭侯

胡騰

按後漢書竇武傳武誅武府掾桂陽胡騰少師事武獨殯斂行喪坐以禁錮武孫輔時年二歲胡騰及令史南陽張敞共逃輔於零陵界詐云已死騰以爲己子而使聘娶焉騰字子升初桓帝巡狩南陽以騰爲護駕從事公卿貴戚車騎萬計徵求費役不可勝極上言天子無外乘輿所幸卽爲京師

臣請以荊州刺史比司隸校尉臣自同都官從事從之自是肅然莫敢妄有干欲騰以此顯名黨錮解官至尙書

胡芳

按後漢書皇甫規傳規字威明爲度遼將軍欲退身避第數上病不見聽會王旻喪還規越界迎之因令客密告并州刺史胡芳言規擅達軍營當急舉奏芳曰威明欲避第仕塗故激發我耳吾當爲朝廷愛才何能申此子計耶

胡潛

按蜀志許慈傳魏郡胡潛字公興卓犖強識祖宗制度之儀喪紀五服之數皆指掌畫地舉手可采

魏 胡昭

按魏志管寧傳潁川胡昭字孔明養志不仕始避地冀州辭袁紹之命遁還鄉里太祖爲司空丞相頻加禮辟昭往應命旣至求去居陸渾山中躬耕樂道以經籍自娛閭里敬而愛之建安二十三年陸渾長張固被書調丁夫當給漢中百姓惡憚遠役並懷擾擾民孫狼等叛亂遂南附關羽羽授印

給兵還爲賊寇到陸渾南長樂亭自相約誓言胡居士賢者也一不得犯其部落一川賴昭咸無怵
惕天下安輯徙宅宜陽正始中驃騎將軍趙儼尙書黃休郭蠡散騎常侍荀顗鍾毓太僕庾嶷弘農
太守何楨等薦昭至嘉平二年公車特徵會卒年八十九拜子纂郎中

胡質

按魏志胡質傳質字文德楚國壽春人也少與蔣濟朱續俱知名於江淮間太祖召爲頓丘令黃初
中徙吏部郎爲常山太守遷任東莞在郡九年吏民便安將士用命遷荊州刺史加振威將軍賜爵
關內侯假節都督青徐諸軍事廣農積穀有兼年之儲置東征臺且佃且守嘉平二年薨子威嗣

吳 胡綜

按吳志胡綜傳綜字偉則汝南固始人少孤母將避難江東孫策領會稽太守綜年十四爲門下循
行留吳與孫權共讀書策薨權爲討鹵將軍以綜爲金曹從事從討黃祖拜鄂長權爲車騎將軍都
京召綜還爲書部典軍國密事劉備下白帝權以見兵少使綜料諸縣得六千人立解煩兩部綜領
右部督吳將晉宗叛歸魏權使綜與賀齊輕行掩襲得宗加建武中郎將魏拜權爲吳王封綜爲亭

侯黃武八年權稱尊號綜爲侍中進封鄉侯兼左右領軍拜偏將軍兼左執法領辭訟赤烏六年卒

胡勃

按萬姓統譜勃豫章人仕吳爲郡功曹嘉禾初太守黃翊爲人所誣勃懷斧詣闕乞代翊罪吳主嘉之後爲廬江太守吳亡入晉懸車不仕

胡冲

按吳志胡綜傳綜子冲平和有文幹天紀中爲中書令

晉 胡廣

按晉書胡奮傳奮兄廣字宣祖位至散騎常侍少府

胡奮

按晉書胡奮傳奮字元威安定臨涇人魏車騎將軍遵子也宣帝伐遼東以白衣侍從左右還爲校尉遷徐州刺史以功累遷征南將軍假節都督荊州諸軍事奮家世將門晚乃好學有刀筆之用所在有聲績泰始末女爲貴人遷左僕射加鎮軍大將軍開府儀同三司後卒於官奮兄弟六人兄廣

弟烈並知名

胡烈

按晉書胡奮傳奮弟烈字武元爲將伐蜀鍾會之反也烈與諸將皆被閉烈子世元爲士卒先攻殺會烈爲秦州刺史及涼州叛烈屯於萬斛堆無援遇害

胡威

按晉書胡威傳威字伯武一名貌淮南壽春人父質仕魏至荊州刺史威早厲志尙質之爲荊州也威自京都定省家貧無車馬僮僕自驅驢單行每至客舍躬放驢取樵炊爨食畢復隨侶進道於是名譽著聞拜侍御史歷南鄉侯安豐太守遷徐州刺史勤於政術風化大行後入朝武帝語及平生因謂威曰卿孰與父清對曰臣不如也帝曰卿父以何爲勝耶對曰臣父清恐人知臣清恐人不知是臣不及遠也帝以威言直而婉謙而順累遷監豫州諸軍事右將軍豫州刺史入爲尙書加奉車都尉拜前將軍監青州諸軍事青州刺史以功封平春侯太康元年卒於位追贈使持節都督青州諸軍事鎮東將軍諡曰烈

古今圖書集成
胡喜

按晉書胡奮傳奮兄廣廣子喜字林甫仕至涼州刺史建武將軍假節護羌校尉

胡熊

按晉書胡威傳威弟熊字季象亦有幹用仕至益州刺史安東將軍

胡弈

按晉書胡威傳威封平春侯卒子弈嗣弈字次孫仕至東平將軍

胡隨

按宋書胡藩傳藩祖隨散騎常侍

胡仲任

按宋書胡藩傳藩父仲任治書侍御史

胡義周

按夏錄義周安定臨涇人也博涉經史尤善屬文初仕秦姚泓爲黃門侍郎以文章著稱泓滅遂仕

於勃勃爲祕書監勃勃作統萬城義周爲之銘頌其功德又有虵祠碑諸文頗行於世

胡略

按夏錄略仕秦姚興渤海公達平北諮議叅軍

胡辨

按後秦錄辨涼州西河人爲世大儒苻堅建元末東徙洛陽隨講受弟子千有餘人關中後進多往從之興勅關尉曰諸生咨訪道義修己勵身往來出入勿拘常限於是學者咸勸儒風遂盛辨少好學博綜經史風韻高爽氣幹不群嘗夜讀書以燭繼晷爲世大儒

宋 胡藩

按宋書胡藩傳藩字道序豫章南昌人少孤居喪以毀稱州府辟召不就須二弟冠婚畢乃參郗恢征函軍事時殷仲堪爲荊州刺史桓元襲仲堪藩叅元後軍軍事轉叅太尉將軍相國軍事義旗起元戰敗乃還家高祖召爲員外散騎侍郎叅軍軍事頻戰有功封吳平縣五等子除正員郎尋轉寧遠將軍鄱陽太守從征司馬休之復爲叅軍加建武將軍領游軍於江津徐達之敗沒高祖怒甚卽

日於馬頭岸渡江而江津岸峭壁立數丈休之臨岸置陣無由可登藩以刀頭穿岸少容腳指於是徑上隨之者稍多旣得登岸殊死戰賊不能當一時奔散高祖伐羌假藩寧朔將軍叅太尉軍事高祖還彭城叅相國軍事論平司馬休之及廣固功封陽山縣男少帝景平元年坐守東府開掖門免官尋復其職四年遷建武將軍江夏內史七年徵爲遊擊將軍到彥之北伐南兖州刺史長沙王義欣進據彭城藩出戍廣陵行府州事轉太子左衛率十年卒諡曰壯侯

胡隆世

按宋書胡藩傳陽山縣男藩卒子隆世嗣官至西陽太守

胡景世

按宋書胡藩傳藩子景世車騎參軍新興太守

胡寶世

按宋書胡藩傳藩子誕世茂世欲奉庶人義康兄寶世詣廷尉歸罪徙遠州世祖初得還

胡遵世

按宋書胡藩傳藩第十四子遵世爲臧質寧遠參軍去職還家與孔熙先同逆謀高祖以藩功臣不欲顯其事使江州以他事收殺之

胡誕世

按宋書胡藩傳藩第十六子誕世率羣從二百餘人攻破郡縣欲奉庶人義康值交州刺史檀和之至豫章討平之

胡茂世

按宋書胡藩傳藩第十七子茂世率羣從二百餘人攻破郡縣欲奉庶人義康值交州刺史檀和之至豫章討平之

胡乾秀

按宋書胡藩傳陽山縣男藩卒子隆世嗣隆世卒子乾秀嗣奪國

胡廉之

按南齊書胡諧之傳諧之祖廉之治書侍御史

南齊 胡諧之

按南齊書胡諧之傳諧之豫章南昌人父翼之州辟不就諧之初辟州從事主簿臨賀王國常侍員外郎撫軍行叅軍晉熙王安西中兵叅軍南梁郡太守以器局見稱徙邵陵王南中郎中兵領汝南太守不拜除射聲校尉州別駕除左軍將軍不拜仍除邵陵王左軍諮議世祖頓盆城使諧之守尋陽城及爲江州復以諧之爲別駕委以事任文惠太子鎮襄陽世祖以諧之心腹出爲北中郎征南司馬扶風太守爵關內侯在鎮毗贊甚有心力建元二年還爲給事中驍騎將軍本州中正轉黃門郎領羽林監永明元年轉守衛尉明年加給事中三年遷散騎常侍太子右率五年遷左衛將軍加給事中六年遷都官尙書爲太子中庶子領左衛率改衛尉八年上遣諧之率禁兵討巴陵王子鸞於江陵兼長史行事臺軍爲子鸞所敗有司奏免官權行軍事如故復爲衛尉領中庶子本州中正諧之有識計每朝廷官缺及應遷代密量上所用人皆如其言十年轉度支尙書領衛尉明年卒贈右將軍豫州刺史諡曰肅

梁 胡明星

按萬姓統譜明星黦人梁天監中累官尚書祠部郎太常丞以耕藉奉引有禮容遷太常卿時宗廟以麪爲犧牲明星上疏切陳不允遂棄官歸

胡山賓

按尚友錄山賓字孝若七歲能言名理十三博通經傳梁武帝普通四年爲散騎常侍東宮新置學士又以山賓居之俄以本官兼國子祭酒

胡僧祐

按梁書胡僧祐傳僧祐字願果南陽冠軍人少勇決有武幹仕魏至銀青光祿大夫以大通二年歸國頻上封事高祖器之拜假節超武將軍文德主帥使戍項城城陷復沒於魏中大通元年陳慶之送北海王元顥入洛陽僧祐又得還國除南天水天門二郡太守有善政晚事世祖爲鎮西錄事叅軍侯景亂西沮蠻反世祖令僧祐討之使盡誅其渠帥僧祐諫忤旨下獄大寶二年侯景寇京陝世祖乃引僧祐於獄拜爲假節武猛將軍封新市縣侯令赴援大破之侯景遁世祖以僧祐爲侍中領軍將軍徵還荊州承聖二年進爲車騎將軍開府儀同三司西魏寇至以僧祐爲都督城東諸軍事

晝夜督戰所在摧殄俄而中流矢卒

胡龍牙

按北史鹿愈傳梁豫章王綜據徐部將成景儁胡龍牙並總強兵內外嚴固愈遂單馬間出徑趣彭城

陳 胡穎

按陳書胡穎傳穎字方秀吳興東遷人其先寓居吳興土斷爲民穎偉姿容性寬厚梁世仕至武陵國侍郎東宮直前出番禺征討俚洞廣州西江督護高祖在廣州穎仍自結高祖高祖南征交趾穎從行役及平李賁旋師穎隸在西江出兵多以穎留守侯景之亂高祖克元景仲仍渡嶺援臺平蔡路養李遷仕穎皆有功歷平固遂興二縣令高祖進軍頓西昌以穎爲巴丘縣令鎮大臯督糧運下至豫章以穎監豫章郡高祖率衆與王僧辯同討侯景以穎知留府事梁承聖初元帝授穎假節鐵騎將軍羅州刺史封漢陽縣侯尋除豫章內史隨高祖鎮京口齊遣郭元建出關都督侯瑱率師禦之高祖選府內驍勇三千人配穎令隨瑱大破之三年高祖圍廣陵齊人東方光據宿預請降以穎